

# Deputà Placi Berther è il nov parsura

Cumissiu administrativa dal Corpus Catholicum

■ (anr/gc) Cun in bellezza resultat da 73 da 77 vuschs è deputà Placi Berther, Tujetsch, vegnì elegì dal Parlament da la Baselia catolica dal Grischun sco nov parsura da la Cumissiu administrativa dal Corpus Catholicum per il rest da la perioda d'uffizi 2009–2013. Fin uss era el vicepresident e schef dal departament «Ovras da la Baselia chantunala.» El daventa successur da deputada Claudia Kleis-Kümin, Tusaun. Quella ha demissionà dacurt per immediat, suenter esser stada be trais onns en uffizi, e cun ina motivaziun curiusa e che lascha percorscher dad esser stada pulitain trumpada.

## «Adebar» survegn vinavant 15 000 francs

Già avant in onn aveva il vicari general, sur canoni e prelat Martin Grichting, fatg la proposta da stritgar la contribuziun da 15 000 frs. da la Baselia catolica chantunala ad «adebar» ch'è in post da cussegliaziun per planisaziun da famiglia, sexualitad, gravidanza e partenadi a Cuira. Motiv: Quella instituziun cussegliava davart metodos da stgatschar ed accumpognia interrupziuns da la gravidanza. Plinavant propageschia ella la «pirla da suenter» (per stgatschar). Quai stettia en contradicziun totala cun la ductrina da la Baselia catolica. Ina instituziun che dettia licenzas da mazzar in carstgaun nunaschi saja per ella inacceptabla. La proposta era vegnida refusada clermain.

Quest onn è il vicari general Martin Grichting turnà cun ina moziun da sura



Placi Berther – il nov president da la Cumissiu administrativa dal Corpus Catholicum.

FOTO G. CAPAUL/ANR

cunegn en il Corpus Catholicum. Sias propostas: La contribuziun ad «adebar» saja da stritgar e la Baselia catolica duai sa retrair da questa instituziun, nua ch'ella è era representada en suprastanza.

La moziun dal vicari general ha effectuà ina lunga, zunt engaschada ed animada discussiun. Quella ha tangà blers aspects da la problematica da cussegliar ed accumpagnar dunnas en gravidanza tar la stgatschada. Igl è anc vegnì fatg ulteriuras propostas, ch'èn dentant vegnidas refusadas.

La finala èn las propostas da la cumissiu administrativa dal Corpus

Catholicum vegnidas acceptadas cun grond pli e la moziun dal vicari general refusada. «Adebar» survegn pia era vinavant ina contribuziun annuala da 15 000 francs dal Corpus Catholicum, dentant sut las suandantas cundiziuns: Quest import na dastga betg vegnir duvrà en l'avegnir per cussegliar davart metodos da stgatschadas u per accumpagnar talas sco era per la «pirla da suenter».

Era refusada è vegnida la proposta da terminar la representanza dal Corpus Catholicum en la suprastanza da l'Uniu-purtadra dad «adebar».

## Rapport, quint e preventiv

Commembers da la Cumissiu da gestiun han preschentà e dilucidà il rapport annual, il quint ed il preventiv.

La Cumissiu administrativa dal Corpus Catholicum haja prestà fitg blera e buna lavur. Cun las finanzas stettia i bain. Il quint serra – tar entradas ed expensas da mintgamai 4,7 milliuns – cun in avanzament da prest 44 000 francs. La facultad è considerabla cun 25,4 milliuns. – Il preventiv per l'onni proxim quinta cun ina entrada da 4,3 milliuns ed in surpli d'expensas d'in bun mez milliun.

## Taglia da personas giuridicas

En il Grischun è vegnì inoltrà avant in temp ina iniziativa dals giuovens liberals cun l'intenziun dad abolir la taglia sin personas giuridicas (firmas). La votaziun surlonder haja lieu l'entschatta da 2014. L'intent da questa iniziativa è da distgargiar finzialmain interpresas.

Quai fa tema era al Corpus Catholicum ed è probabel stà la raschun ch'ins ha envidà il president dal Cussegl sinodal da la Baselia catolica dal chantun Turitg, Benno Schnüriger, dad orientar il Parlament da la Baselia catolica dal Grischun surlonder. El è da l'opiniun ch'i dettia bleras bunas raschuns per mantegnair la taglia da cultus da personas giuridicas. Dad ina taglia tenor mandat, colliada cun ina intenziun, na tegna il referent betg bler. Politicain saja quella betg realisabla.

La Baselia catolica da Turitg ha entradas totalas da prest 200 milliuns. Da quels derivan 56,7 pertschien da personas giuridicas. Grondas summas van per la pastoraziun en il vast senn dal pled ed era per tala en bleras linguas estras. Mo era per l'administraziun, scolaziun, socialester e cultura èsi dad impunder meds considerabels. Per il cas ch'ins dismettes la taglia da baselia per personas giuridicas, stuessi ina fitg gronda part da l'activitad da la Baselia vegnir stritgada. E quai pertutgassi fitg bler e fitg blers.